

Díli, 13 Dezembru 2019 – FONGTIL ho apoiu husi Servisu Parseria Komisaun Europeia no FAO (projetu FIRST), hala'ó seminariu kona-ba Seguransa Aihan no Nutrisaun.



Iha Timor-Leste, tasa desnutrisaun ba labarik tinan-lima mai kraik no fetu ho idade reprodutiva iha numeru ne'ebe ás liuhusi número aseitável ne'ebé difini husi OMS (Organizasaun Mundial Saúde) ba problema saúde pública iha área urbana no rural, iha munisípiu hotu no entre labarik fetu no mane. Número anémia no todan liu ne'ebé aumenta dadauk kontribui makas ba impaktu todan husi malnutrisaun. Kondisaun ne'ebé nia karateristiku maka eziste hamutuk ho desnutrisaun, defisiensia mikronutriente, todan liu no obesidade.

Baseia ba análise dados sekundariu, IPC (Integrated Food Security Phase Classification/ Fase Klasifikasaun Integradu ba Seguransa Aihan), ne'ebe halao ba dala uluk iha tinan 2018, hatudu katak 36% populasaun iha nível inseguransa aihan moderadu to'ó grave.

Kauza ba inseguransa aihan, malnutrisaun no kiak, mai husi setor oioin no kompleksu tebes. Maibe ita hatene katak 13% deit husi labarik iha Timor-Leste mak konsumu aihan mínimo aseitavel (2016, MS) no ema nia asesu ne'ebe menus liu ba be mos, saneamentu no edukasaun sekundariu (liliu ba fetu no labarik fetu) iha korelasaun ho tasa malnutrisaun ne'ebé ás iha labarik tinan-lima mai kraik.

Inseguransa aihan sai mos hanesan kauza prinsipál ba malnutrisaun. Tan ne'e tenki diversifika produsaun no produtividade agríkula bazeia ba prátika ne'ebé sustentável no resiliente ba klima. Agríkultór fetu ne'ebe produs menus liu 15% husi mane sira iha kada ektaria (2018, World Bank, UN Women), tamba sira nia asesu ne'ebe menus ba insumu, servisu no teknolojia, ne'ebe presiza atensaun espesial atu nuneé bele rezolve mos problema jéneru iha produtividade agríkula.

Situasaun ne'e presiza parseria no aliansa ne'ebe foun no forte, tan neé bazeia ba resultadu husi konsultasaun lubuk ida ho parseirus no revisaun koletivu ba evidensia ne'ebe iha, seminariu ne'ebe hala'ó liuhusi FONGTIL ho Gabinete Primeiru Ministru nia lideransa, iha objetivu atu haforsa diálogo política entre sociedade sivil, governu, setor privadu, parseirus dezenvolvimentu, representante husi munisípiu no mos média.

Hafoin oficialmente loke seminariu ne'e, Kordenador Apoiu Sociedade Sivil ne'ebe halao mos knar nudar representante Primeiru Ministru ba Asuntu Seguransa aihan no Nutrisaun (ne'ebe responsabiliza mos ba diálogo entre governu no sociedade sivil) subliña kona-ba importansia atu elabora politika no programa nutrisaun no seguransa aihan ida ne'ebé bazeia ba vantajen komparativu husi setor idaidak. Kámara Komérsiu no Industria, Asosiasaun Empresariu Xinés no importadór aihan lubuk ida ne'ebé representa setór privadu, partisipa ativu iha diskusaun hodi lori sira nia perspetiva, esperiensia no rekomendasaun pratiku iha dialogo ida ne'e.

FONGTIL nia kapasidade atu hala'ó no lidera dialogu multi parseria ida neé rezulta partisipasaun ne'ebe diak husi setór oioin hanesan setór privadu, média inklui partisipasaun husi oficial governu no representante organizasaun sociedade sivil lubuk ida.